



BÍSER 35

JU Osnovna škola
"Behaudin Selmanović"



Sarajevo, juni 2025.

Sadržaj

Literarni radovi

Slikovnica o energiji

Projekat "Škola za piliće"

Ogledni čas

Projekat - Stećci

Posjeta kinu

Škola u prirodi

Škola plivanja

Posjete i projekti

Ekskurzija

Takmičenja

Likovni radovi

Izdavač

Urednik: Edina Žugor - Šalaka

Tehnički urednik: Šeherzada Tahić Zahirović

Nastavnici saradnici: Aida Hadžić, Hajrija Velić, Amela Muftić Arapović, Mensur Kopić, Haris Dahija, Elvedina Žunić, Elvira Imamović, Agnesa Tucaković, Enisa Kanlić, Nevresa Podrug, Ermina Muslić - Hubijar, Semina Vileš - Šipo, Nermin Imamović, Emina Pintol, Havka Ahmetović Velić, Adnan Bešić.

Dragi čitaoče,
pred tobom je novi broj "Bisera" koji i
ovaj
put donosi zanimljive priče i isječke
iz školske 2024/2025. godine.
Iza nas brojne aktivnosti, rezultati,
posjete,
projekti.

U ovom broju smo izdvojili samo
djeliće
koji trebaju biti podsjetnik na
sva dešavanja koja čuvamo u našoj
bogatoj riznici.



Vjesnici proljeća

U proljeće sunce budi svoje carstvo da zajedno dočekaju povratak lasta. Laste još dočekuje i mirisno cvijeće. Sa njima i jedna mala visibaba na prostranoj livadi pored koje se nalazi probeharali voćnjak. U njenom komšiluku proviruje i ushićena jagerčevina, dok joj se smiješi prelijepa ljubičica. Svi su nestrpljivo isčekivali njihov povratak. Trava je počela sve više zeleniti, a vesele ptice cvrkutati. Visibaba je podigla glavicu jer se brinula zašto laste kasne. Toliko su se brinuli da je sunce poslalo male vojnike, svoje najtoplije zrake u potragu. Srećom, vojnici su bili jako hitri i odmah su pronašli laste. Rekli su da laste odmaraju na obližnjoj rijeci i da će brzo krenuti. Kada su laste stigle ispričale su suncu kako je na jugu. Visibabi su ispričali kako je prošao put. A cvijeću su govorkale o tome koliko još mirisnih, šarenih biljaka živi južnije. Toliko su se raspričali da su zaboravili na san. Kada su laste vidjele da sunce odlazi u krevet i one su pošle u svoja topla gnijezda, koja su vrijedno gradile. Tako su laste stigle i proglašile proljeće. Zrak je postao čišći, ljepši i svježiji. Nebo je dobilo najljepšu plavu boju, rijeke milozvučno počele žuboriti. U svim ljudima svijeta probudila se jača želja za životom i novim pobjadama.

Proljeće

Proljeće u grad kad stigne
odnese sve brige.
Male laste kući stižu,
dok visibabe glavice ponosno dižu.

Djeca trče po brijezu,
kao do skoro po snijegu,
ali sada još radosnije.

Čovjek od miline ne zna šta bi,
cvijeće mirisao,
laste dozivao
ili samo se smijao.

Proljeće najljepše mirise
nama donese.

Proljeće poput njezne djevojke
cvijeću priča priče,
sve na najljepše liče.

Naša pjesma o zemlji

U šumi ptice pjevaju
Rijeke biserno teku
Svuda zelenilo raste
Svijet je lijep, tako je pravo!

Plavo more, bijeli cvijet
Sunce sja, to je svijet
Zajedno ćemo brinuti
I čistu zemlju sačuvati

Zemlja, zemlja, naša draga
Čistimo je sve do posljednjeg dana
Čuvajmo je, volimo je
Ovo je dom za sve

Recikliraj, čisti, brini
Uvijek srećni, uvijek mirni
Zemlji dajemo ljubav svu
Ona je naša, ona je tu

U okviru časa Muzičke kulture učenici IV-2 su osmislili tekst i melodiju pjesme „Naša pjesma o Zemlji“. Pjesmu su izveli na Oglednom času, 22. aprila 2025.godine.

Volim planetu Zemlju

Svako malo i veliko dijete
Voli prirodu naše planete!
Volim njene ljepote: planine,
rijeke, mora, šume i puteljke-
zato čuvaj Zemlju i ne bacaj otpatke.
Stavljam ih u kontejnere ili u vreću
Povećaj zdravlje i sreću!

Lamija Podrug IV-2

Moja priroda

Priroda je sve što vidiš
Priroda je sve što čuješ
Priroda je sve
Zato je čuvaj
Zato je pazi
Zato je mazi
Molim te ja
Molim te ja

Davud i Džan IV-2

Nemojte bacati smeće u prirodu

Nemojte bacati smeće u prirodu
Bosnu našu čuvaj, njenu ljepotu
Nikom je ne daj dirati!
Nemojte smeće bacati,
Planeta će biti tužna.
Molim vas!
Nemojte bacati smeće u prirodu!

Farah IV-2



Lamija Sarač IX-1

Jesen

Posmatramo jesen žutu i tihu,
pa vam šaljemo izvještaj u stihu.

Jesen je stigla u naš kraj,
zato još više volimo svoj zavičaj...

Jesen je osvojila velike bodove
zato što daje slatke plodove.

Na desnoj strani stola korpi voća,
jednako parira korpa povrća.

Svaki učenik četvrtog jedan
bio je izrazito marljiv i vrijedan.
Iako je na početku papir bio čist,
svaki je na kraju dobio jesenji list.

U našu učionicu, na jesenji pir
došao je lav, vjeverica, jež i leptir.

Imamović Elvira, naša učiteljica,
s velikim oduševljenjem dala je mnogo petica.

Kako bi proslavili jesen, za kraj,
popili smo svi od šipurka čaj!

IV-1



Slikovnica o energiji

Kroz istoriju, ljudi su koristili razne oblike i izvore energije - drvo za ogrjev, energiju vode i vjetra za pokretanje mašina, naftu... Najmoderniji oblik energije je električna energija koja nam je danas posvuda na raspolaganju.

Da bi proizvele električnu energiju, neke elektrane koriste energiju: SUNCA, VJETRA, RIJEKA, MORA, TOPLE VODE UNUTRAŠNOSTI ZEMLJE. To su OBNOVLJIVI IZVORI ENERGIJE. Stalno su prisutni u prirodi i ne možemo ih potrošiti.

Puno više elektrana koristi NEOBNOVLJIVE IZVORE ENERGIJE. Jednom kad se ti izvori potroše, više se ne mogu nadomjestiti. Te elektrane koriste FOSILNA GORIVA - UGLJEN, NAFTU I PLIN .

O izvorima energije smo istraživali, tako da smo napravili našu slikovnicu koju možete pregledati, pročitati i saznati o energiji.

U radu su učestvovali svi drugari našeg IV-2 odjeljenja, sa učiteljicom Žunić Elvedinom.



PROJEKAT „ŠKOLA ZA PILIĆE - ČUDO NOVOG ŽIVOTA“

U Osnovnoj školi „Behaudin Selmanović“ u periodu februar-april, je realizovan projekt „Škola za piliće - čudo novog života!“. Projekat je realizovan u IV-1 odjeljenju, a realizatori projekta su prof. razredne nastave Imamović Elvira i magistar biologije Zuko Minela.

Priroda je puna tajni, a jedna od najfascinantnijih, upravo je nastanak života. Među najzanimljivijim metodama i načinima dolaska na svijet nalazi se inkubacija jaja. Učiteljice zajedno sa učenicima su inkubirale jaja i izlegli piliće u školskim prostorijama.

U skladu sa kurikularnom reformom, tokom dva mjeseca sa učenicima je realizovano interdisciplinarnih 27 aktivnosti iz predmeta Bosanski jezik i književnost, Matematike, Moje okoline, Muzičke kulture, Informatike, Likovne kulture, Tjelesnog i zdravstvenog odgoja i nauke.

U srijedu, 9. 4. 2025. u Osnovnoj školi „Behaudin Selmanović“ svečano je otvorena „Škola za piliće“, održan ogledno-ugledni čas i prezentiran projekt „Škola za piliće, čudo novog života“!

Svojim prisustvom, sam događaj, uveličali su predstavnici Instituta za razvoj preduniverzitetskog obrazovanja Kantona Sarajevo, direktorica prof. Senada Salihović, Ajla Halilović, MA-Viši saradnik za IT, dr. Damir Mušanović – Viši saradnik za praćenje učeničkih postinuća, te predstavnica Ministarstva za odgoj i obrazovanje Fahira Kalajdžisalihović – pomoćnik ministra za predškolski i osnovni odgoj i obrazovanje

Dobar glas, daleko se čuje

U četvrtak, 10. 4. 2025. godine učenici IV-1, učiteljica Imamović Elvira i asistentica u nastavi Zuko Minela su kolegama sa Berufskolleg Simmerath/Stolberg, Region Aachen iz Njemačke, predstavili projekt „Škola za piliće, čudo novog života“. Prisutni, Anna Gershake, Oliver Benz i Tonći Grubišić, koji su posjetili našu školu, vidjeli su primjere dobre prakse i primjenu kurikularne reforme u nastavi.



SVE JE LAKŠE KAD IMAMO PODRŠKU PARTNERA - NAŠIH DRAGIH RODITELJA!



Partnerstvo sa roditeljima je garancija za uspješne rezultate u nastavi. Tako je, u petak, 11. 4. 2025. godine, na obostrano zadovoljstvo, projekat "Škola za piliće, čudo novog života!" predstavljen i roditeljima učenika IV-1. Roditelji su imali priliku da vide šta su naši vrijedni učenici radili i naučili tokom dva mjeseca projekta. Tom prilikom su se posebno zahvalili dedi Muji Kadrić, koji je dao veliki doprinos ovom projektu, nesebično pomagao u svim fazama projekta te prihvatio da udomi i brine se o našim pilićima.

Vođeni izrekom "Znanje je veće kada se dijeli", svoje znanje su podijelili sa učenicima iz 6 odjeljenja razredne nastave.

Pored toga što su učenici imali priliku vidjeti čudo novog života, voditeljice ovog projekta su kroz realizaciju učenicima dale krila za istraživanje, eksperimentisanje i stalno učenje.




OGLEDNI ČAS



Učenici IV-2 sa učiteljicom Žunić Elvedinom su realizovali Ogledni čas iz predmeta Moja okolina, Nastavna jedinica: Čuvajmo planetu Zemlju. Čas je održan 22.aprila 2025.godine.

Cilj časa je podizanje ekološke svijesti kod učenika; da upozorimo na opasnosti koje prijete životu na Zemljji, ekosistemu i urbanim sredinama.



Projekat „Stećci - misteriozni Kameni spavači“

Clj ovog projekta je da podstakne mlade na očuvanje, brigu i ljubav za materijalno i nematerijalno kulturno-historijsko i prirodno naslijeđe Bosne i Hercegovine. Zajednički nam je zadatak ukazati na potrebu kontinuirane brige o prirodnom i kulturnom naslijeđu, pejzažima, spomenicima prirode i nacionalnim parkovima, nacionalnim graditeljskim spomenicima, a posebno stećcima.

Stećci ili Kameni spavači kako ih je nazvao pjesnik Mak Dizdar, srednjovjekovni su nadgrobni spomenici koji predstavljaju zajedničku kulturnu baštinu naroda BiH i jednu od najvećih misterija ovih prostora.

Sinonimi za stećak su i nazivi: bilig, kâm, mramor, zlamen, kuća, poznati i kao mramorje, mašeti, grčko groblje, kaursko groblje i divovsko kamenje.

Pojavljuju u periodu između XII i XVI stoljeća na teritoriji srednjovjekovne Bosanske države.


Karakterišu istoriju srednjovjekovne bosanske države i njenih susjednih krajeva.

Najviše stećaka, oko 60.000, nalazi se u Bosni i Hercegovini, a mogu se naći i u pograničnim područjima Hrvatske (oko 4.400 stećaka), Srbije (oko 4.100 stećaka) i Crne Gore (oko 3.500 stećaka).




Njihovi oblici, ornamenti, natpisi, dimenzije, brojnost i nadasve potpuna ukorijenjenost u srednjovjekovnom društvu, izdvajaju ih iz svega sličnog u tadašnjim evropskim i svjetskim okvirima. Zbog toga su prepoznati i od svjetske javnosti pa je fenomen stećaka uvršten na listu svjetske baštine UNESCO-a 2016. godine.

Na listi nalazi se ukupno 30 nekropola, od kojih se 22 nalaze na teritoriju Bosne i Hercegovine, po tri na području Srbije i Crne Gore i dvije na teritoriju Hrvatske. Od bosanskohercegovačkih općina, najbogatije stećcima su Konjic i Nevesinje. Obje imaju preko 3000 spomenika. Od ostalih općina koje imaju veliki broj spomenika treba spomenuti Rogaticu, Livno, Trebinje, Stolac, Gacko, Sokolac, Kalinovik i Bileću.



POSJETA KINU CINESTAR




U četvrtak 7.11.2024. godine učenici VII-1 razreda sa razrednicom Hadžić Aidom, te učenici VII-2 razreda i članovi ekološke sekcije sa razrednicom Velić Hajrijom, posjetili su kino CineStar i odgledali film Transformersi.

Ovu posjetu je upotpunio jedan poseban gest učenika VII-1 razreda, jer su u kino pozvali i druga, koji od ove školske godine pohađa drugu školu. Ponosni smo na njih...

Posjeta kinu je prošla u najboljem redu, učenici su pokazali odgovornost, kulturu ponašanja i disciplinu.

POSJETA KINU NOVI GRAD



Učenici IV razreda u pratnji učiteljica Imamović Elvire, Žunić Elvedine i Makić Samre su 22.11.2024.godine posjetili Kino Novi Grad. Gledali su projekciju animiranog filma "Male šape na velikom putovanju". Cilj ove posjete je da kod učenika razvijamo ljubav prema filmu, kinometografiji.



ŠKOLA U PRIRODI



Učenici četvrtih razreda u pratnji učiteljica Imamović Elvire, Žunić Elvedine, Makić Samre i asistentice Zuko Minele su realizovali „Školu u prirodi“ na Vlašiću u periodu od 4.12.2024. do 6.12.2024. godine.

Nastavni sadržaji i aktivnosti su prilagođeni uzrastu učenika i mjestu boravka. Učenici su u tom periodu usvojili nove sadržaje, uživali u sportskim aktivnostima i snijegu. U slobodno vrijeme izražavali svoju kreativnost.

Osim boravka na Vlašiću gdje su saznali o postupku proizvodnje vlašičkog sira, obišli su u Travniku: Plavu vodu, kuću Ive Andrića i Šarenu džamiju.

Boravak u prirodi je protekao u igri, smijehu i lijepom druženju.



ŠKOLA PLIVANJA



U periodu od ponedjeljka 12.5. 2025. do petka 16.5.2025.godine, učenici IV razreda OŠ "Behaudin Selmanović" su u pratnji svojih učiteljica Imamović Elvire, Žunić Elvedine, Tucaković Agnese te Asistentice u nastavi Zuko Minele, pohađali školu plivanja na Olimpijskom bazenu. Naše učenike su plivanju, osnovnim tehnikama, podučavali vrijedni instruktori. Učenici su pokazali zavidno interesovanje za plivanje, bili vrijedni, uporni i disciplinirani.



POSJETA DOMU ZA STARAI NEMOĆNA LICA “MIRSEN”

VOLONTIRANJE JE COOL

U sklopu svojih redovnih volonterskih aktivnosti učenici, koji su dio projekta "Volontiranje je cool!", odlučili su svoje vrijeme pokloniti osobama treće životne dobi, korisnicima Doma za stara i nemoćna lica Mirsen koji je smješten u naselju Rajlovac. Učenicu su po prvi put imali priliku upoznati se sa ustanovom ovakvog tipa, korisnicima koji borave u ustanovi, uslugama koje se nude, stručnim osobljem, kao i samim načinom rada.

Za ovu priliku učenici su pripremili simbolične poklone, kao i pisma podrške, koja su domaćinima na tren izmamili osmijeh popraćen suzama radosnicama. Spoj mladosti i iskustva je pokazao da se vrijeme može kvalitetno provesti bez obzira na starosnu razliku kroz druženje, lijepu, toplu riječ i kroz igranje društvenih igara.

Zahvaljujemo se Senajilu Kurtiću, direktoru Doma za stara i nemoćna lica koji je omogućio posjetu našim volonterima i koordinatoricama, kao i stručnom osoblju na toplom gostoprimstvu i slatkim poklonima koje su pripremili. Radujemo se nastavku saradnje.



POSJETA SVRZINOJ KUĆI




Učenici petih razreda Osnovne škole "Behaudin Selmanović" u pratnji učiteljica Podrug Nevrese, Kanlić Enise i Hubijar-Muslić Ermine u srijedu, 16.4.2025. godine posjetili su Svrzinu kuću, Despića kuću i Staru pravoslavnu crkvu u Sarajevu.

Posjeta je bila edukativnog karaktera, gdje su učenici mogli vidjeti i bolje se upoznati sa načinom života i običajima za vrijeme Osmanske vladavine i Austro-ugarskog perioda. Znanja koja su usvojili kroz nastavne sadržaje nadogradili su sa edukativnim predavanjem kustosa ovih muzeja.



E K O L O G I J A - P O S J E T A Z A Š T I Ć E N I M P O D R U Č J I M A K S



Učenici petih razreda Osnovne škole "Behaudin Selmanović" u pratnji učiteljica Podrug Nevrese, Kanlić Enise i Hubijar-Muslić Ermine u srijedu 23.10.2024. godine realizirali su vannastavnu aktivnost: "Ekologija-Posjeta zaštićenim područjima KS" u okviru koje su posjetili

Spomenik prirode "Vrelo Bosne" i izletište "Stojčevac". Tokom posjete šetali smo uređenim stazama i uživali u čistom zraku i predivnoj prirodi. Ova edukativna posjeta je bila odlična prilika da učenici nauče više o životnim zajednicama, važnosti očuvanja prirodne baštine i jačanju ekološke svijesti. Tokom posjete upoznali smo različita staništa biljaka i životinja, primijetili promjene na njima i praktično prikupljali materijale koje ćemo iskoristiti prilikom pravljenja zbirk biljaka u učionici. Od Vrela Bosne kraćom i ugodnom šetnjom Velikom alejom uživajući u prirodi obojenoj jesenjim bojama došli smo na izletište Stojčevac. Brojne biljne vrste, izrazito svjež i čist zrak, izvor čiste vode i malo jezerce, uređeni sportski tereni i zelene livade Stojčevac čine idealnim mjestom za izlet u prirodi koji preporučujemo da posjetite i uživate u jesenjoj čaroliji.

Dječja lica pokazuju oduševljenje jednog radnog nastavnog dana u prirodi.





Zemaljski i historijski muzej

Učenici petih razreda Osnovne škole "Behaudin Selmanović" u pratnji učiteljica Podrug Nevrese, Kanlić Enise i Hubijar-Muslić Ermine u četvrtak, 13.2.2025. godine posjetili su Zemaljski i Historijski muzej u Sarajevu.

Uz divno druženje, posjeta je bila i edukativnog karaktera.

Znanja koja su usvojili kroz nastavne sadržaje uspješno su povezali sa eksponatima i izložbenim postavkama, a koje se odnose na historijski period Bosne i Hercegovine kroz vijekove.





UČENICI IV RAZREDA SU POSJETILI ZEMALJSKI MUZEJ

U srijedu, 7.5.2025.godine su učenici IV razreda u pratnji učiteljica Imamović Elvire, Žunić Elvedine, Tucaković Agnese i asistentice Zuko Minele posjetili Zemaljski muzej Bosne i Hercegovine.

Uz organizovano stručno vođenje grupa učenici su imali priliku vidjeti eksponate razvrstane po odjeljenjima (arheološko, etnološko i odjeljenje prirodnih nauka) u nekoliko zbirki (prahistorijska, folklorna, prirodoslovna i druge).

Učenici su proširili svoja znanja, uživali u posjeti i druženju!



POMOĆ POPLAVLJENIM PODRUČJIMA

Početkom mjeseca oktobra našu zemlju su pogodile katastrofalne poplave sa brojnim ljudskim žrtvama i velikim materijalnim gubicima. Naša škola se i ovaj put priključila i podržala humanitarnu akciju u kojoj su učestvovali uposlenici, učenici zajedno sa roditeljima, a kojom su koordinirale Aida Hadžić, nastavnica tehničke kulture i Amela Muftić – Arapović, socijalna radnica škole. Donirana su znatna sredstva u higijenskim potrepštinama, školskom priboru, hrani, odjeći i obući. Značajan doprinos u realizaciji ove humanitarne akcije dali su naši volonteri kroz donacije, ali i kroz pomoć u sortiranju artikala i pakiranju. Donirana sredstva su uručena Udruženju Pomozi.ba.





NIJEDNO DIJETE BEZ PAKETIĆA

“Nijedno dijete bez paketića” je humanitarna aktivnost koju Udruženje „Ruku na srce“ realizira

već 14. godinu, a u okviru kojeg se nastoje obezbijediti novogodišnji paketići za djecu iz porodica u stanju socijalne potrebe. Protekle zime,

podijeljeno je čak 4.000 paketića mališanima predškolskog i školskog uzrasta sa područja Kantona Sarajevo, ali i čitave Bosne i Hercegovine.

Na naše veliko zadovoljstvo, i ove godine smo podržali ovu aktivnost, koju su koordinatorice

Aida Hadžić, nastavnica i Amela Muftić – Arapović, socijalna radnica realizirale uz podršku učenika, roditelja i uposlenika škole.

Obradujmo djecu, jer svako dijete zaslužuje osmijeh na licu.



GALERIJA VOLONTERIZMA



Međunarodni dan volontera, volonteri naše škole obilježili su učešćem u završnoj manifestaciji projekta "Volontiranje je cool!" koja se ove godine realizirala u online formi, jer su organizatori Udruženje CROA sredstva za organizaciju odlučili usmjeriti za pomoć stradalima u razornim poplavama koje su pogodile područja naše zemlje.

Osamnaest volontera: Lamija Zeba, Lajla Zuban, Ema Oglečevac, Džana Kišić, Ilhana Šabanović, Ammar Curić, Lemmana Čavčić, Rejhana Imamović, Amna Sakić, Lamija Šabanović, Nedžla Huseinbašić, Sumea Trnka, Lamia Vehabović, Hena Turčalo, Danin Šehović, Ajdin Ruhotina, Vedad Šabić i Ilhan Ćato, zajedno sa koordinatoricama projekta Aidom Hadžić, nastavnicom i Amelom Muftić – Arapović, socijalnom radnicom škole, kroz prezentaciju predstavili su školu i humanitarne aktivnosti koje su realizirane u proteklom periodu.

Na Galeriji Volonterizma predstavile su se 51 osnovna škola učesnica projekta iz 5 bh. kantona, koje su imale 100.000 volonterskih sati, 300 volonterskih aktivnosti i više od 1000 volontera.

Hvala svima koji su prepoznali značaj projekta "Volontiranje je cool!": volonterima, učenicima, roditeljima, kolegama koji su kroz donacije pomagali humanitarne aktivnosti, Selmiru Fehratoriću, direktoru, kao i nastavnicima: Havki Ahmetović-Velić, Šeherzadi Tahić Zahirović, Mensuru Mujiću i Nerminu Imamoviću na organizacijskoj i tehničkoj podršci.

„Lijepo je iskustvo pomoći nekome kome je to potrebno, nadam se da ćemo imati još puno ovakvih akcija i da ću u svakoj novoj imati priliku da pomognem, to nas podstiče da budemo bolje osobe i da smo od koristi društvu“, poruka je volonterke Nedžle Huseinbašić.



M O J A K O S A -

T V O J A K O S A

U prostorijama naše škole realizovali smo projekat "Moja kosa-tvoja kosa". Projekat je podrazumijevao da djevojčice doniraju kosu @Udruženju Srce za djecu oboljelu od raka.

Dvanaest djevojčica odlučile su da učestvuju u projektu, a to su naše heroine: Emina Topalović (8-1), Lemmana Čavčić (7-1), Ismihana Tatlić (7-1), Azra Šabanović (6-2), Ejna Suljović (5-1), Amila Jakupović (5-2), Asja Buljubašić (4-1), Adela Gušić (3-3), Anida Mutapčić (3-3), Ajlin Terović (3-2), Zehra Velić (kćerka naše kolegice Havke) i Amina Žunić naša najmlađa donatorica koja ima 5 godina, prvi put se šiša, a ujedno i prvi put donira svoju kosu.


Uz naše drage djevojčice projektu se pridružila majka naše učenice gospođa Čavčić Đenana, te smo sa njom imali ukupno trinaest vrijednih donacija. Izuzetno smo ponosni na naše drage donatorice i naš projekat, jer 15.2. je Međunarodni dan djece oboljele i liječene od raka, a mi smo svojim djelom pokazali da smo ruka podrške onima kojima je to potrebno.

Pridružite nam se i vi...

Od srca se zahvaljujemo frizerskom salonu "KF" u Hrasnom i divnoj Elmi Oruč, svim kolegama i kolegicama, te roditeljima na podršci pri realizaciji ovog vrijednog projekta. Projekat su realizovale nastavnica Aida Hadžić i socijalna radnica Amela Muftić-Arapović.



Poklon kao podrška



Za međunarodni dan žena Aida Hadžić, nastavnica i Amela Muftić - Arapović, socijalna radnica škole zajedno sa uposlenicama škole su podržali Udruženje "Ruku na srce" koje organizira projekat "Od srca za nju", u sklopu kojeg se nastoje obezbijediti paketi osnovnih higijenskih potrepština ženama iz porodica slabijeg materijalnog stanja.

Upozlenice škole su prepoznale važnost ovog projekta da pored poklona, žena ženi pruži podršku i vrati osmijeh na lica.

IZAZOV SELEKTIVNOG ODLAGANJA OTPADA, SMANJIMO NAŠ EKOLOŠKI OTISAK


Tokom boravka na Vlašiću, učenici IV razreda su uživali u odgojno-obrazovnim zadacima.

Jedna od realiziranih tema je „Izazov selektivnog odlaganja otpada, smanjimo naš ekološki otisak“ i praktične radionice koje su se bavile temama ekologije, istražujući na koji način mogu doprinijeti očuvanju životne sredine.



Učenici četvrtog razreda su kroz razne zadatke imali priliku da razmisle o svojim navikama u vezi s otpadom i nauče kako njihove akcije mogu pozitivno utjecati na okolinu, o tome kako selektivno odlaganje otpada može smanjiti njihov ekološki otisak i doprinijeti očuvanju prirode. Kroz interaktivne igre, diskusiju i kreativne zadatke učenici će biti motivirani da prepoznaju svoju ulogu u zaštiti okoline i budu podstaknuti da prepoznaju važnost razvrstavanja otpada kako bi smanjili negativni utjecaj na životnu sredinu.

DAN RUŽIČASTIH MAJICA



Učenici 7-1 razreda su Dan ružičastih majica obilježili tako što su pisali pisma podrške drugarima i drugaricama sa jasnim porukama da ne podržavaju ni jedan oblik nasilja.

Budimo primjer! Pružimo ruku, stanimo uz one kojima je potrebna pomoć i pokažimo da je snaga u dobroti.

Nasilje prestaje kada svi odlučimo da kažemo NE!

OBILJEŽAVANJE 8. MARTA



U okviru historijske sekcije učenice naše škole s nastavnicom historije Eminom Pintol pripremile su i na poseban način obilježile Međunarodni dan žena 8. mart.

Priprema plakata s biografijama značajnih, a malo poznatih žena iz prošlosti, imala je za cilj motivisati djevojčice da pomjeraju granice i ostvare uspjeh uprkos ograničenjima koja im društvo nameće. Fatima El Fihri, Rosa Parks, Emelin Penkhrst, Bjula Henri su biografije koje motivišu i bude ponos kod svake žene. Učenice su izradile cvjetove s porukama kojima su obradovale sve učenice i uposlenice škole. Poruke sadrže riječi ohrabrenja ženama da istraju u borbi za bolji položaj i sreću svake žene.”

JA INVESTIRAM U ZAJEDNICU

Učenici IV-og razreda naše škole, (IV-1 Elvira Imamović, Minela Zuko, IV-2 Elvedina Žunić, IV-3 Tucaković Agnesa), u vremenskom periodu od 3. 2.- 16. 2. 2025. su realizirali radionicu o poduzetništvu pod imenom „Ja investiram u zajednicu“.

Cilj aktivnosti jeste omogućiti učenicima da kroz radionice razviju i provedu poslovni plan za prodaju napitaka ili čajeva.

Aktivnosti su obuhvatile: upoznavanje sa planiranim aktivnostima, podjela učenika u grupe i podjela zadataka, nabavka sastojaka odjel za istraživanje i razvoj, odabir lokacije i marketing, izrada reklamnih plakata, nabavka papirnih čaša, slamki, salveta, priprema stana, prodaja i finansije, planiranje utroška sakupljenih sredstava

Planirano je da dio zarađenih sredstava preusmjerimo na troškove odlaska u muzej (prijevoz, ulaznice, kustos), a preostali dio novca usmjeravamo prema akciji „Nijedno dijete bez ekskurzije i mature“ i tako podržimo naše maturante.

U saradnji sa Vijećem roditelja, svoju prodaju napitaka učenici su realizirali 16. 2. 2025. kada se održavao turnir za učenike od I do IV razreda.

Posebnu zahvalu šaljemo roditeljima IV razreda koji su nas podržali i pomogli u realizaciji ove aktivnosti.



DAN JABUKE



21.10.2024. godine učenici V razreda naše škole su uz pomoć svojih učiteljica Podrug Nevrese, Hubijar-Muslić Ermine i Kanlić Enise obilježili Dan jabuke. Učenici su pripremili prigodan program, ali i razne delicije od jabuka u kojima smo svi zajedno uživali.





PROJEKAT "VOLIM BOSNU I HERCEGOVINU"

U utorak, 25. 2. 2025. godine, održan je finalni kviz projekta Volim Bosnu i Hercegovinu. Projekat je trajao od oktobra do marta mjeseca. Učenici su tokom tih 5 mjeseci pokazali zavidan nivo znanja o svojoj dragoj i jedinoj domovini. Četiri ekipe koje su igrale finale kviza u sklopu projekta Volim Bosnu i Hercegovinu su: Bosanske kraljice IX (Alma Durmišević IX1, Amina Gluščević IX1, Lamija Sarač IX1), Bosanski vitezovi IX (Bakir Ferić IX1, Salih Gušić IX1, Sanin Pribišić IX1), Bosanski pioniri (Nadira Hodović, Ajnur Ibišević, Emin Jakupović) i Bosanski vitezovi VIII (Ahmed Moro VIII2, Bakir Čarković VIII2 i Faris Podrug VIII2). Pobjedu su ponijeli Bosanski vitezovi.

Posebno pohvaljujemo mlade članove sekcije Šareni svijet koji su izveli svoje tačke, OSBS mlade muzičke nade Fazlić Sajru i Selimović Esmu, kao i sve učenike, nastavnike i saradnike koji su svojim trudom i radom doprinijeli da finale izgleda veličanstveno.

Domovina se brani i čuva znanjem. Ponosni smo na svoje učenike!

Jer volimo Bosnu i Hercegovinu!



Promocija Zbornika učeničkih radova – Večer posvećena stvaralaštvu



Dana 16.05.2025. godine, u holu naše škole održana je promocija Zbornika učeničkih radova.

Ovaj događaj okupio je učenike, nastavnike, roditelje i goste u prijatnoj i svečanoj atmosferi. Bila je to prilika da se istakne kreativnost, trud i talenat naših učenika, koji su svoje misli, ideje i emocije pretočili u pisanu riječ.

Zbornik obuhvata raznovrsne literarne i likovne radove, a sam događaj bio je prožet ponosom i radošću. Program je upotpunjjen muzičkim i dramskim tačkama koje su dodatno uljepšale večer.



E K S K U R Z I J A



11.5.2025. godine učenici IX razreda OŠ "Behaudin Selmanović" krenuli su na maturalno putovanje u pravnji razrednika Edine Žugor-Šalaka (IX-1), Semine Vileš-Šipo (IX-2), Muharemović Mirsada (IX-3) i direktora škole Selmira Fehratovića.

U ugodnoj atmosferi iz Sarajeva smo krenuli u 7,30. Prvo odredište Konjic, obilazak Titovog bunkera. Zanimljiva priča, oduševljenje istom kao i izgledom te dugo čuvane tajne. Nastavili smo dalje do Jablanice u kojoj smo posjetili Muzej bitke za ranjenike. Ponovo vraćanje u neka prošla, teška vremena, priče koje treba čuvati od zaborava. Put nas dalje vodi do Ljubuškog. Spuštamo se do veličanstvenog vodopada Kravica što svojom snagom i izgledom donosi neku posebnu vrstu ugođaja. Ta je silna snaga u potpunom kontrastu sa osjećajem mira u svakom posjetiocu i posmatraču. Nastavljamo do Počitelja u kojem nas čeka kamena kula, vjerni stražar nad gradom koji čuva tajne, sjećanja na neka prohujala vremena. Kroz šarenilo i žamor turista, prati nas hercegovačko sunce dok usijana kaldrma broji korake znanih i neznanih. Vraćamo se putovanju i krajnjem odredištu - Zaostrogu. U hotel "Bossina" stižemo u 19,30.

12.5. - odlazimo u planiranu posjetu Splitu. U pravnji izuzetno profesionalnog i prijatnog vodiča agencije "Biss tours" obilazimo jezgro grada, znamenitosti što privlače pažnju turista koji se smjenjuju i odlaze puni utisaka od viđenog i doživljenog.

U večernjim satima povratak u Zaostrog. Druženje i odmor protiču u vedroj atmosferi koju upotpunjujemo šetnjom pored mora i valova što zapljuškaju obalu u jednoličnom, opuštajućem ritmu. 13.5 - posjeta Makarskoj. Ručak na brodici. Izuzetan ugođaj uz more i sve njegove čari. Nepregledna pučina pred nama, osjećaj slobode, ljepota i užitak.

14.5. - dan povratka u Sarajevo. Svraćamo u Park prirode "Hutovo blato." Vožnja kroz barsku trsku, u društvu pokoje radoznale čaplje - potpuni mir i odmor kakav samo priroda može pružiti.

Potom svraćamo u Čaplinu i odmaramo u ugodnoj hladovini restorana "Vila Rustica."

Slijedi posjeta Vrelu Bune, zelenooke ljepotice, što u svojim valovima mnoštvo priča čuva, nosi hiljade tajni.

Po još jednu razglednicu s ovog putovanja svraćamo u Mostar, grad na Neretvi, biseru Hercegovine. Stari se ponosno nadvio nad njom, uzdigao u svojoj ljepoti i prkosu vremenu, prkosu godinama teškim.

Sa lijepom uspomenom ulazimo u autobus i vraćamo se najdražem odredištu - našem Sarajevu, jedinom, nezamjenjivom. Radosnim drhtajem srca i susretom sa dragim licima završavamo ovo putovanje u večernjim satima. Riznica sjećanja bogatija za još jednu životnu stranicu.





Dobrinja Tri granate

Učenici naše škole u pratnji nastavnice Neire Čampare i nastavnika Nermina Imamovića, dana 4. februara 2025. godine, odali su počast ubijenim građanima Sarajeva. Odavanje počasti desilo se u Ulici Oslobođilaca Sarajeva, na mjestu gdje je život izgubilo 9 građana Dobrinje i Sarajeva, a 16 je ranjeno. Iako je prošla 31 godina od tužnog događaja, ne smijemo dopustiti da vrijeme izbriše sjećanje na stradanje stanovništva opkoljenog Sarajeva.

Ponosni smo na naše učenike koji su odali počast i sačuvali sjećanje i svima nama pokazali kako je važno očuvati kulturu sjećanja na godine stradanja, ponosa i slave.



DAN GRADA SARAJEVA-ŠAHOVSKI TURNIR-KRALJ I KRALJICA OSBS

U subotu 5.aprila 2025. godine, u prostorijama naše škole održan je šahovski turnir povodom 6. aprila-Dana grada Sarajeva. Turnir je imao radni naslov „Kralj i kraljica OSBS“.

Na turniru su ostvareni sljedeći rezultati:

Kategorija djevojčice:

Kraljica OSBS-Vehabović Lamia VII1

Kategorija dječaci:

1. mjesto-kralj OSBS-Daris Čarković VI2

2. mjesto- vitez OSBS-Davud Ćuprija VII3

3. mjesto-plemić OSBS-Danijal Muratović VII3

Posebna nagrada je dodijeljena „mladom plemiću šahisti“ Rahman Dženanu III3.

Sve čestitke našim učenicima na dostojanstvenom ponašanju.

IZVJEŠTAJ SA OPĆINSKO G TAKMIČEN JA IZ PRUŽANJA PRVE POMOĆI



Na Općinskom takmičenju iz pružanja Prve pomoći koje je održano u subotu, 19.4.2025.godine u Petoj gimnaziji u konkurenciji 15 osnovnih škola Općine Novi Grad, učenice naše škole osvojile su odlično 3.mjesto.

Učenice koje su bile dio ekipe su:

- 1.Rijalda Muslić, VIII-2
- 2.Amna Fehrić, VIII-2
- 3.Hena Ušanović, VIII-2
- 4.Farah Zuko, VIII-2
- 5.Ema Oglečevac, IX-2
- 6.Džana Kišić, IX-2

Voditelj sekcije Prve pomoći je nastavnica biologije Hajrija Velić.



Općinsko takmičenje iz geografije

Na općinskom takmičenju iz Geografije održanom 11.4.2025. godine u prostorijama OŠ "Sokolje", naši učenici su osvojili odlično 2. mjesto sa ostvarenih 206,5 bodova.

U konkurenciji 45 učenika iz 15 novogradskih škola, naši učenici pojedinačno su ostvarili sljedeći uspjeh:

- 6. mjesto Sarač Lamija -71,5 bodova
- 7. mjesto Pribišić Sanin -69,5 bodova i
- 10. mjesto Gušić Salih – 65,5 bodova

Učenike pripremala nastavnica geografije Semina Vileš-Šipo





TAKMIČENJE "UPOZORENJE NA OPASNOST OD MINA"

Ekipa učenika sedmih razreda OŠ "Behaudin Selmanović" koju čine: Džaferović Farah, Hajdarević Zerina, Ćato Ilhan i Šabanović Lamija osvojila je prvo mjesto na takmičenju "Upozorenje na opasnost od mina" u organizaciji Crvenog križa na nivou općine Novi Grad Sarajevo. Učenike je za takmičenje pripremala nastavnica historije Emina Pintol.



ATLETSKI KUP



Dana 22.04.2025 godine održano je Općinsko atletsko takmičenje za osnovne škole gdje je naša učenica Zuban Lajla osvojila 3. mjesto u bacanju kugle i tim rezultatom osigurala nastup na Kantonalmnom takmičenju, koje je održano 05.05.2025. godine, na kojem je Zuban Lajla osvojila 7. mjesto. U pratnji nastavnik Kopić Mensur



Atletsko takmičenje "Najbrži uz Najbržeg"


Dana 30.09.2024. godine u organizaciji AK Novi grad održano je atletsko takmičenje "Najbrži uz Najbržeg" gdje su učestvovali osnovne i srednje škole iz Kantona Sarajevo. Učenici naše škole ostvarili su rezultate: Bojić Armin 2. mjesto, Topalović Adna 4. mjesto i Ruhotina Ajdin 4. mjesto. Pored ovih učenika nastupili su još Bećirović Tarik, Pašić Džana, Zukić Adin, Bajrić Ajla i Huseinbašić Nedžla.



A T L E T S K O T A K M I Č E N J E " 3 . Z I M S K I D J E Č I J I A T L E T S K I M I T I N G

Dana 18.12.2024 održano je atletsko takmičenje" 3. ZIMSKI DJEČIJI ATLETSKI MITING" u olimpijskoj dvorani Juan Antonio Samaran. Gdje su pored sarajevskih škola uzele učešće i škole iz Mostara, Zenice i Bijelog polja. Učenici naše škole osvojili su zapažene rezultate u svojim kategorijama.

Tarik Bećirović u kategoriji 2009/10 godište osvojio 2. mjesto u discipline 60 m. Armin Bojić u kategoriji 2009/10. osvoji 4. Mjesto u disciplini 60m. Adna Maksumić u kategoriji 2009/10 osvojila 4. Mjesto u disciplini 60m. Topalović Adna u kategoriji 2011/12. osvojila 5. mjesto u disciplini 60m. Pašić Džana u kategoriji 2011/12. osvojila 7. mjesto u disciplini 60m. Te 3. mjesto u mješovitoj štafeti 4x50m koju su trčali Tarik Bećirović, Adna Maksumić, Armin Bojić i Adna Topalović. Te treba pohvaliti Saliha Gušića i Farah Zuko na učešću na takmičenju.



IZVJEŠTAJ SA MALONOGOMETNOG TURNIRA

Dana 01.10. 2024. godine na Općinskom malonogometnom turniru "Nedim Škamo i saborci" održanom u sportskoj dvorani "Ramiz Salčin" u organizaciji udruženja maloljetni borci Armije BiH, učešće je uzelo 13 Osnovnih škola sa općine Novi Grad. Učenici naše škole osvojili su 2. mjesto. A za najboljeg golmana proglašen je Sanin Pribišić. Pored Sanina su još igrali: Salih Gušić, Arman Velić, Adnan Maguda, Bakir Ferić, Tarik Bećirević, Armin Bojić i Davud Lilić.



KANTONALNO TAKMIČENJE U MALOM NOGOMETU



Od 23.04 do 25.04.2025 godine održano je Kantonalno takmičenje u malom nogometu gdje su učešće uzele 24 škole sa područja Kantona Sarajevo. U organizaciji Internacional schools MAARIF. Naši učenici zauzeli su 3 mjesto. A učenik Gušić Salih je bio najbolji strijelac sa 8 postignutih golova. Učenici koji su nastupali: Pribišić Sanin, Ferić Bakir, Bećirović Tarik, Maguda Adnan, Velić Arman, Gušić Salih, Bojić Armin, Bečović Sanin, Karailo Tarik i Šukalo Robel Uz pratnju nastavnika tjelesnog i zdravstvenog odgoja Dahija Harisa i Kopić Mensura.



OPĆINSKO TAKMIČENJE U ODBOJCI ZA DJEVOJČICE I DJEČAKE



Dana 17.02. održano je finalno općinsko takmičenje iz odbojke za djevojčice i dječake u dvorani OŠ "Umihana Čuvidina". Učenici naše škole su osvojili dječaci 2 .mjesto, a djevojčice 4. mjesto.

Za dječake su nastupali: Za djevojčice su nastupali:

Edin Barimac Trnka Merjem

Gušić Salih Zuko Farah

Pribišić Sanin Delija Emina

Ferić Bakir Pašić Džana

Velić Arman Gušić Hana

Bećović Sanjin Maksumić Adna

Nogo Kenan Gluščević Amina

Bećirović Tarik Sarač Lamija

Zlatić Emre

Šukalo Robel



Uz pratinju nastavnika tjelesnog i zdravstvenog odgoja
Dahija Harisa i Kopić Mensura

IZLOŽBA RADOVA IZ KULTURE ŽIVLJENJA

Dan državnosti




Dana 20.11.2024. godine učenici petih razreda naše škole, zajedno sa svojom nastavnicom Aidom Hadžić, prigodnom su izložbom radova sa časova kulture življenja na temu Bosanski ćilim našoj dragoj, jednoj i jedinoj Bosni i Hercegovini čestitali 25.novembar
- Dan državnosti.






Čoko Berina IX-2




Saračević Ahmed IX -2



Ćato Nejra IX-2



Husić Dalal IX-3



Muminović Maida IX-2

Gluščević Amina IX-1



Sarač Lamija IX-1



Husić Dalal IX-3



Ademović Sajma
IX-3



Karavdić Harun IX-2




Lošić Aiša I-1



MERJEM Topalović



Lošić Aiša I-1



Hedo Dalia I-1

50

DALIA



Ferić Vedad V-3

Osnovna škola "Behaudin Selmanović"
Viteška 6,
71000 Sarajevo,
Bosna i Hercegovina